

REPUBLIKA Y'UBURUNDI



IBIRO VY'UMUKURU W'IGIHUGU

**IJAMBO NYEN'ICUBAHIRO UMUKURU
W'IGIHUGU ASHIKIRIJE KU MUSI
W'UBUMWE BW'ABARUNDI**

Bujumbura, kuwa 05 Ruhuhuma 2006

- Nyakubahwa Mukuru w'Inama Shingamateka
- Nyakubahwa Mukuru w'Inama Nkenguzamateka
- Nyakubahwa Cegera ca kabiri c'umukuru w'igihugu
Banyakubahwa muri mu biro bikuru vy'inama
nshingamateka
- Banyakubahwa muri mu biro bikuru vy'inana
nkenguzamateka
- Banyakubahwa bashikiranganji
- Banyakubahwa Bashingamateka muri hano,
- Banyakubahwa bakenguzamateka muri hano
- Banyakubahwa muserukira ibihugu vyanyu hano mu
Burundi,
- Banyakubahwa muserukira imiryango mpuza-
makungu hano mu Burundi,
- **Barundi, Barundikazi, Rwaruka, Ncuti z'uburundi**

1. Kuva igenekerezo rya 05 Ruhuhuma umwaka w'igihumbi n'amajana icenda na mirongo icenda na rimwe (1991), uko umwaka utashe, Uburundi n'Abarundi bama bahimbaza umusi wahariwe ubumwe bwabo. Baribukanya ingene bashitse ku masezerano y'ubwo bumwe, bagakubita agatima mpembero k'ingene bayagendeye n'ingene boyabungabunga.
2. Si ivy'imbeshire Abarundi bashitse kuri ico ciyumviro barababaye, mbere bararuhijwe n'indyane zishingiye ku moko n'intara zari zarigize ndanse.
3. Kubera intwaro mbi n'umutima w'amaronko vyari vyariganje mu Burundi bifatiye ku ntwaro ya mwana wa mama, uwo mudasangije ubwoko canke intara yaca acika mukeba, mbere akaba umwansi wo kwigizayo ndetse bigashika naho aba uwo gukuraho. Ukwikekana, akagaye, akarenganyo n'inzigo vyaba izuba riva, ata gihanura, kugeza naho uwuririye uwiwe yagandaguwe yitwa nawe umumenja ; n'izindi mvugo mbi mutayobewe zitabereye abantu bavukana.

4. Ivyo vyarabaye imyaka n'iyindi, amakungu arorera, rimwe na rimwe agasemerera, akamira, bigacureha, ariko impera n'imperuka bikaba ivy' ubusa.
5. Kubera intwaro mbi, haca hakoreshwu igikenye, bagacisha ku buhomba uwo wese yahirahira agashira hejuru ibiriko biraba mu gihugu. Hariho abishwe, hariho abangajwe abandi bagatotezwa twitwa ngo twari mu gihugu cigenga.
6. Ariko ineza yama itsinda inabi. Vyaratevye, ariko bukebuke abarundi batari bake barabonye ko igihugu gitegerezwa kuba ico abarundi bose ata nyagupfa ata nyagukira, kandi ko atari uko, ntaho twariko turaja. Nakare ikintu cose kigira igihe caco, ubu turiko turabisezerera Imana ishimwe.

**Banyakubahwa muri hano,
Barundi, Barundikazi, Rwaruka,
Ncuti z'uburundi,**

7. Umuti watowe muri ico kiringo kwari uko abarundi b'ubwoko bwose bokwicarana bakaganira ibibatandukanya, bagasangira ubutegetsi muri vyose ata wandya wangura. Ibiganiro hagati y'abarundi b'ubwoko n'intara zose bica biratangura, amasezerano arandikwa, udutabo abarundi bazoshobora kugendana kurya k'umukristu yemera agendana bibiliya turakwiragizwa mu bantu, indirimbo ishimigiza ubumwe iratorwa n'ibendera ry'ubumwe rirategurwa, riraduzwa rirahungabana eka n'ibindi bimenyetso nk'inkofero
8. Birumvikana rero ko ubumwe bw'abarundi bwari buronse ikibanza gikwiye kandi c'iteka mu mvugo.
9. Abarundi bose aho bari bariruhukije, bati tugiye twogorora, indyane z'amoko n'imitumba zirarangiye, bati amahoro agiye gusasagara mu gihugu cose, Leta nayo ibandanye icungerera umutekano abanyagihugu no gukora n'ibindi biyega.

10. Igenekerezo rya 05 Ruhuhuma 1991, ni ho abarundi basidukana n'iyonka ku mirwa mikuru y'intara n'amakomine batewe akamo na Leta, ngo bahimbaze uwo musi w'imbonekarimwe wo kunywanisha abarundi bose. No mw'Ibwirizwa Nshingiro, ubumwe bw'abarundi bwararonse ikibanza gihambaye.
11. Ntibwakeye kabiri, vyaragaragaye ko ubwo bumwe bwari ubwo ku munwa gusa, urwiri rw'amacakubiri rwari ruciganje mu mitima y'abarundi bamwe bamwe, canke y'uturwi tumwe tumwe.
12. Agatimatare k'abarundi bamwe bamwe kaciye kibonekeza kuva intwaro rusangi itanguye kwigishwa mu gihugu, biba akamaramaza cane cane mu gihe abarundi bari bahejeje kwitorera ababarongora. Cabaye ikimenyamenya c'uko ubumwe bw'abarundi butari bufashe, ko kari akarimi gusa.
13. Nkako, nta murundi n'umwe w'umutima atateye ivyatsi abantu canke imirwi y'abantu yaciye ivuguruza abanyagihugu, ishize imbere ubwoko n'intara, n'aho amasezerano y'ubumwe yari amaze imyaka mike yemejwe, aririmba mu birori bihuza abantu benshi, mu majambo ya misi yose, **kuko bwari ubumwe bwo mu majambo gusa, ubumwe bwo ku karimi, kuko amacakubiri yari yarirabitse gusa ataho yagiye, arindiriye igihe nyaco ngo atutuze, abavyeyi bahekurwe, inganda zisasikwe.** Hakenewe rero ubumwe mu mutima ubwa mbere bugaca bugaragara mu bikorwa.
14. **Muti none ubu ho tugeze he ko aho twavuye tuhazi ?**
Mu kirundi bavuga ngo : "*Igit i ntikigukora mu jisho kabiri kiba gishaka kurimena*". Abarundi aho tugeze uno musi, twabonye vyinshi, twumvise vyinshi, ivyiza n'ibibi. Tuzi rero vyinshi bishobora kudufasha, dukoresheje ubwenge n'umutima runtu dufise, twisunze amategeko y'igihugu be n'ay'Imana yaturemye ikanaturemera igihugu ciza c'Uburundi.
15. Ntitwibaze na rimwe ngo tuzoshikira igihe aho uburundi buba nk'Iparadizo, aho ingwe ibana n'impene mu ruhongore rumwe

ata ngorane, canke aho abantu bo kw'isi yose bazobana ata wurya urwara uwundi, canke mu bitwerekeye aho abarundi b'ubwoko bwose, imiryango yose n'intara zose bazovuga rumwe kuri vyose na hose, abatovyi ntibabe bakivugwa mu gihugu, urugendo turacarugenda ariko intango ni nziza ntawokwihebura, haracari ivyizigiro. Tureme.

16. Bimwe bimwe mu vyagira akaranga k'abarundi b'aho hambere bwari ubumwe hagati yabo : umwana yari umwana wa bose, yaba umuhutu canke umututsi canke umutwa. Uwurwaye yaterurwa ku nderuzo n'ababanyi biwe bose, ata gutandukanya ubwoko. Inzu ihiye yazimwa n'ababanyi atawurinze kwiyumvira ubwoko bwa nyene inzu ihiye. Uwahisha urwarwa, uruhwabare n'ibusyano ni ko k'uko yabisangira na bose. Abarundi karaduciyemwo ariko ntibigasubire, turavyanse.
17. Inkwezi y'amarere ya vyose bwabaye ubutegetsi bubi, ubutegetsi bw'ubugunge, intwaro ya mwana wa mama, intwaro yagendera ku macakubiri y'amoko n'ay'intara, icibagiwe co n'ibitsina.
18. Uno musi rero uri hejuru, duhimbaza ubugira cumi na gatanu abarundi tumaze tugize amasezerano yacu y'ubumwe. Tuwuimbaje mu bihe bidasanzwe na gatoyi aho abarundi bo mu bwoko bwose, b'intara zose n'imigambwe yose baheruka kwitorera inzego nshasha z'ighugu zizobarongora mu kiringo c'imyaka itanu iri imbere.

Icambere Leta y'ubu ishira imbere ni ukunagura ubwo bumwe bwatosekaye, abarundi bakabwiyumvamwo koko, bakabugendera mu buzima bwabo bwa misi yose, bugaheza bukabonekera mu mibano no gufashanya mu bikorwa vy'iterambere, gushika aho mbere babwirahira kurya umuntu yirahira uwamugabiye. Ubumwe bujanye n'urukundo duhabwa n'iyaturemye. Hamwe umurundi uwariwe wese yumva ko ari urugingo rwa mugenzi we. Ivyo dutegerezwa kubisaba Imana ijoro n'umurango, izobidushoboza mugabo tubanze duhindure imitima yacu.

19. Aboba bataranyurwa n'yo ngendo nshasha ya Leta canke batanezerezwa n'uwo mugambi uhambaye wo kunywanisha abarundi, tubasavye kugira intambwe yo kuwutegera kuko ni ineza ya twese, kuko ari umugambi ntasubirwamwo wa bose, muri iyi ntwaro abarundi bose baherutse kwitorera, n'umushinge w'amahoro arama n'iterambere nyaryo, n'ubutunzi bw'umutima ukize.
20. Ntidusamare, ngo duhendwe tubona! Aboba bagifise ako gatimatare basengerwe bazokira nabo, kuko ata kibanza c'abatovyi kikiriho. Ni bikazanure nyabuna bafashe abandi barundi bose kwubaka igihugu, twese hamwe tugire urunani rw'intamenwa, ubumwe nyakuri budusage, ibinjana n'ibinjana bikuranwe.
21. Muri iyo ngendo yo gukomeza ubumwe nyabwo mu barundi, Leta yimirije gushinga wa **murwi ujejwe gutohoza ukuri n'uguharirana** mu misi ya vuba. Muze mwitabe, muwumvire, muwushigikire kandi muwufashe mu gikorwa gihambaye co kunywanisha abarundi uzoba ujejwe. Ico gikorwa naco ni nk'ifumbire ku giterwa, kizotuma ubumwe nyabwo bukura.
22. Leta ntizohengeshanya guhanura kabiri, gatatu abo bose bakijuragiza abandi mu mugambi w'amahoro, kuko na kare ngo: "*Uwutosora ifuku yamizayo akatsi*", no guhana bibaye ngombwa.
23. Abarundi twese turaciye ubwenge kandi ubu bugiye kwiyongera, ingorane twaciymwo z'amacakubiri zatubereye isomo, turazi gutandukanya icatsi n'ururo. Twamirire rero kure uwo wese yorota ngo adusubize mw'ihumbi yitwaje ubwoko, imiryango, intara n'ubundi bubegito bwose ataworinda kudondagura ngaha. Muti ico gihe cararangije, aze abibe mu rugo iwe gusa.

24. Ni tumenye twese ko umuryango dufise kandi dusangiye ari umwe, ari wo wo kwitwa **umurundi**, n'umurima rusangi umwe aribwo **Burundi** Imana yaturemeye.
25. Twigenze neza nkuko mumaze igihe muvyerekana maze inyungu y'ubumwe nyabwo bwacu ibe umutekano kuri bose, iteka, ubutungane n'iterambere riciye mu bikorwa. Harageze ko abarundi bakura amaboko mu mpuzu bagakora bivuye inyuma, cane cane muri iki gihe amakungu yasubiye kutwizera, ashobora kudufasha.

Ve hasi rero mwijukire ibikorwa vyo soko ry'iterambere, musonere amasaha y'akazi, mukore nk'abikorera. *Ibintu ntivyizana, biraronderwa*", nta gihugu na kimwe cateye imbere kubera ubunebwe no kudakunda akazi.

**Barundi, Barundikazi,
Rwaruka, namwe ncuti z'uburundi**

26. Kuri uno musi duhimbaza ubugira cumi na gatanu amasezerano y'ubumwe bw'abarundi, birakwiye ko twosabikanya ivyo dufise kandi tugahora tuzirikana ingene iyi ntambwe yo kurondera amahoro no kunywanisha abarundi twayishitseko. Ni ngobwa ko twosangira twese ikivi n'ikiyago, tukiyumvamwo ubumwe nyakuri, tukabusabira ku Mana kurama no kuramba.
27. Ni ngombwa kwubaha na ntaryo itunga rya Leta, rikabungabungwa neza kuko ari iry'abarundi bose. Uwutazobigira gutyo, akibuka kubogora amaze gusesa, Leta imaze kumushengeza imbere y'abarundi bose ntagire ngo ntiyari abizi, amenye gusa ko «*Intabarirwa ibwirwa n'uko amaso atukuye* » kandi ngo «*agapfa kaburiwe ni impongo* ».
28. Mwirinde gusaba canke gutanga igiturire. Mwubahirize umuntu wese mu vyiwe, kuko bitagenze gutyo bazovuga ngo *naka yanyatse igiturire kuko tudasangiye ubwoko, umuryango, intara canke umugambwe, ngo naka ntiyanyakiriye neza mu*

*biro kubera izo mvo nyene, ngo naka ntiyehanywe kuko ari
muri ubu bwoko canke buriya, n'ibindi,*

29. Mu kanya hararirimbwa rwa ruririmbo ruhayagiza ubumwe, mbere bamwe bamwe bazungagize amaboko nk'uko basanzwe bamenyereye, ariko turasubiye kumenyesha ko ubumwe nyakuri buri ku mutima bukabonekera mu mibano, mu gufashanya mu bikorwa, mu kwipfurizanya ineza, no mu gushirahamwe.
30. Nico gituma turangije dusaba abarundi gukomeza no kugendera ubumwe nyakuri burangwa n'umwumvikano mu mibano no mu bikorwa, hamwe n'umutima ukunda abavukagihugu bose.Ubumwe nyabwo bubonekere mu gufatana nyabuna mu mitima biva m'urukundo twabuze, harageze rero dutere intambwe.

Tugire amahoro n'ubumwe nyakuri bw'abarundi.

Imana ihezagire Uburundi n'abarundi.

MURAKOZE.